

## UPNA IN MITMUHNA AH KHUAVAK HIKHIN LO!

Upna in leitungmitmuh na ah atawntungin khuavak bangin tangden lo hi. Banghanghiam i cih ciangin, mihingte muh theihloh, tel theihloh, ngaihsut theihloh, theihzawhloh Pasian nuntakzia, Pasian itna leh hongcin hongkepna te tungah kingakna in upna hi a, tua Pasian nasepna zia khempeuh te leitung mit tawh mu in, i bil tawh za in, i khut tawh i lawng thei khin ngeikei hi. Upna khuavak in leitungmit tawh akimu thei khuavak sangin tangzaw in, vakzaw ahih manin, leitung mitmuhna in amuhnawn loh thute hongmusak ahizaw hi. Nitang in adangdang atang thei khempeuh ii vakna, tanna te tungah gualzo in, tua adangdang atangthei te amial tawh aki batsak mah bangin, upna khuavak in zong, leitung ah khuavak muhna hongpia, leitung mitmuhna, leitung mihing te ngaihsut theihna te tungah gualzo in, Ni bangin atang ahihi.

Hih thu hangin upna anei mitam pi te ii, aleitung nuntak na sung uhah, leitung haksat gentheihna, lunglen khua ngaiha na, dahna lungkhamna, kahna le khitui luanna te khimkhua zing bangin, amau te tungah meiipi bangin kaai a, amau te nuntakna lampi aliahcipzo zahdongding in tuamcip thei hi. Tua ahih manin, khatveivei ciangin upna in ei leitung nuntak na sungah khuazing lampai tawh hong kibangsak thei hi. Bang hanghiam cihleh i muhtheih lohna mun ah upna tawh pai in, i theihlohna mun upna tawh i masuan hi. Christian thu ummi khat peuhmah in hih thu theihding, i telding athupi ahihi. Upna in khatveivei khuazing tawh ki bangin, ka up Pasian a om mah hiam, ka Pasian in kei hong taisan hiam cihzahdong in lungkham dahna leh kahna aw tawh i kapthei hi. Topa Jesu in Singlamteh tungah "Ka Pasian, ka Pasian aw, bang hangin kei hong taisan na hi hiam (Mt 27:46)" ci-in naki ko hi. Athuakna hangin, lunggim bek hilo in, leitung mawhna in amah leh a Pa kikal ah khimkhuazing bangin dal a, a Pa mai liah ahih man in, hici bangin akiko ahihi.

Hih thute i ngaihsut ciangin, Christian upna in leitung hauhna, kicinna, nopsakna te hong kamciam hi masa lo in, mitmuh loh, bil zakteihloh, khuttawh aki sukha theilo, Pasion kiang, nuntakna picing hong kamciam ahihna teltak in kimu thei hi. Hih thu hangmah in, Christian masa te in Christu Topa a dingin aneih alamh teng uh suplawh bek thamlo in, anuntak na mahmah uh apiakkhiat dongun Christian upna ah nacistak uhhi. Tua in Christian upna ahihi.

Tuhun ciangin, tuabang upna anei ding mi muhhak i sa mahmah ta hi. Hih thuhangin Topa Jesu in "Mihing Tapa hong kumkik ciangin hih leitungah upna neimi amu ding hiam" (Lk 18:8) ci-in, nalung himawh mahmah khin hi. Tuhun Christian tampi te in Christian upna pen hauhna, sum le paai zonna ah senpyi na, motor hoih lei zawhna, inn hoih lo hoih neihzawh na, cidam na, daupai na, gualzawhna, cihciang bek in ngaihsun uhhi. Pasion nasem kici mitam pi takin zong, tuabang muna aom mite pen "Thupha sang minam! Thupha ngah innkuan! Thupha ngah minam!" cih bangin pahtawi in lungkimsak mah mah uhhi. Tuat khempeuh Pasion thupha ahih nathu aman ahihi. Ahi zongin tuabang thupha i san ciangbekin thupha ngah minam, thupha ngah innkuan i hih lohna thu zong theih sakhuai, genhuai hi. Pasion thu ummi te in sehnal gambang nuntakna akantan dingin kigingsa in a omden ding i hi zaw hi. Tua hi leh Canaan gam atung Pasion minam taktakte ihi pan dinghi. Leitung haksak gentheihna, dahna kahna leh lunglen khua ngaihna te in eite tungah meiipi bangin kaai in, tuukguah bang in hong zuphial a, thaanghuih bangin eite hongmut in, tuihual bangin eite dinmun leh giahphual te hongngawk a, zinling bangin eite upna bul honglok mah taseleh, Topa Jesu tawh akibangin "Ka Pasion aw, banghangin kei hong taisan nahiam" ci-in, tau kawm in, anunung ciangin, "Pa aw, nangma khut sungah kei mah kong ki-ap hi" (Lk 23:46) aci thei mite in Christian upna nei taktak te ahi uhhi. Tua bang upna aneiden zo dingin khat le khat upna sungah khutkilen in mapang khawmciat ni!

Ref. The Classic of Western Spirituality: John of the Cross, Selected Writings, ed. Kieran Kavanaugh, O.C.D. New York, Mahwah: Paulist Press, 1987. Pp. 82-84.